

- 22 Staðfesting forsetans á skipulagsskrá fyrir „Minningarsjóð Mortens Hansens“,  
8. febr. útgefin á venjulegan hátt að mandatum af dómsmálaráðherra 8. febr. 1950.  
Skipulagsskráin er þannig:

## SKIPULAGSSKRÁ

fyrir Minningarsjóð Mortens Hansens.

### 1. gr.

Sjóðurinn er stofnaður af samverkamönnum og nokkrum nemendum Mortens Hansens skólastjóra eftir fráfall hans. Sjóðurinn heitir Minningarsjóður Mortens Hansens.

### 2. gr.

Eign sjóðsins er nú kr. 5800.23 og er geymd í sparisjóðsbók nr. 22571 í Landsbanka Íslands. Skal fé þetta jafnan ávaxtað á tryggilegan hátt.

### 3. gr.

Hlutverk sjóðsins er að styrkja efnilega nemendur Miðbæjarskólans til framhaldsnáms. Þegar sjóðurinn er orðinn kr. 10000.00, skal vöxtum hans varið annað hvert ár í þessu skyni. Styrkinn skal hljóta nemandi í öðrum hvorum efstu bekkja Menntaskólans í Reykjavík, enda hafi hann áður sótt Miðbæjarskólann (eða skóla, sem tæki við af honum) 2 skólaár hið minnsta. Eftir að höfuðstóll er orðinn 20 þús. kr. getur sjóðstjórnin ákveðið að fleiri skuli hljóta styrki.

### 4. gr.

Stjórn sjóðsins skipa skólastjóri Miðbæjarskólans, formaður fræðsluráðs Reykjavíkur og rektor Menntaskólans í Reykjavík. Skulu þeir annast vörzlu sjóðsins, sjá um að ávaxta hann og enn fremur hafa á hendi úthlutun úr honum. Stjórnin skal halda gerðabók, sem hún löggildir, og skrá í hana samþykktir sínar varðandi ávöxtun sjóðsins, úthlutun og annað, er máli skiptir.

### 5. gr.

Reikningsár sjóðsins er almanaksárið. Reikningar hans skulu færðir í gerðabók hans og endurskoðaðir af endurskoðendum Reykjavíkurbæjar.

### 6. gr.

Leita skal staðfestingar forseta Íslands á skipulagsskrá þessari og hún birt í B-deild Stjórnartíðindanna.